

ERTZAINZA. Eginbideak, Madrilera igorriak

Ertzaintzak Lezon eta Erreenterian izandako jarrera salatu dute

Erreenteriako esku-hartzearen ondorioz, 63 urteko gizon bat erietxean da

Axun Erzibengoa | ERREENTERIA

Joan den asteburuan Ertzaintzak Erreenterian eta Lezon izaniko «jokabide faxista» salatu zuen atzo Askatasunak, ohar baten bidez. Gipuzkoako bi herri horietan baimenduta zeuden ekitaldietan hainbat lagun atxilotu zituen Ertzaintzak, eta hainbat zauritu eragin.

Ostiralean, bi preso ohiren ongiatorria geldiarazi eta Gorka Intxausti hitzaldia egiten ari zen gaztea atxilotu zuen Ertzaintzak. Hainbat ertzainen artean hartu eta kolpeka eraman zuten furgonetara, lekukoek EGUNKARIARI adierazi ziotenez. «Terroismoa goraipatzea» egotzi zioten gazteari, eta goizaldean utzi zuten aske, deklaratu gabe.

Intxausti atxilotzeaz gain, Ertzaintza jendearen aurka oldartu zen. Ondorioz, Jesus Ozteta 63 urtekoa erietxean dago, aldaka apurtuta. Beste lagun batek 14 puntu behar izan zituen buruan egin zioten zauria josteko. Gertaera horien ondotik, hainbat herritar ertzain-etxera joan ziren azalpen eske, eta Jose Antonio Iriarte atxilotu zuten han bertan, eta gero aske utzi.

Larunbatean, berriz, Lezon lau lagun atxilotu zituen Ertzaintzak: Aitor Sarasola alkatea, Mikel Mitxelena zinegotzia, Begoña Sagarzazu preso ohia eta herriko beste gazte bat, Venezuelako euskal iheslarien aldeko manifestazio batean pankarta zeramatenak. Haiei ere «terrorismoa goraipatzea ego-

tzi zieten», eta larunbat gauean bertan askatu zituzten.

Amnistiaren aldeko ikurra

Manifestazioa eta pankartako goiburua baimenduta zeuden. Atxilotzeko arrazoia pankartan amnistiaren aldeko ikurra agertzea zela esan zieten, bere garaian Eduardo Txillida eskultoreak eginikoa.

Erreenteriako eta Lezoko atxilotuen diligentziak Madrilgo Auzitegi Nazionalaren esku utziko ditu Ertzaintzak.

Azkenik, igande goizaldean, aspaldian presoan argazkiekin jarrita zegoen egurrezko panela kendu zuen Ertzaintzak Erreenteriako Herriko Enparantzatik.

Askatasunak gogor salatu zituen atzo gertaera horiek, eta asteburuan Euskal Herrian presoan inguruan ekitaldi ugari —16 aipatzen zituen— egin diren arren beste inon ezer ez dela gertatu nabarmendu zuen.

Ildo horretatik, Erreenteriako eta Lezoko gertaeren erantzukizuna «Ertzaintzarena» dela ondorioztatu zuen Askatasunak. «Jarduera hori plangintza baten barruan doan edo Erreenteriako ertzainburuaren ardura soilaren ezin dugu jakin», zioen, eta «jarduera totalitarioa» izan zela erantsi. Zauritzea, atxilotzea, «presoan argazkiak apurtzea, Txillidak eginiko amnistiaren aldeko mugimenduaren logoa kriminalizatzea» gertaera arrazkarriak dira Askatasunarentzat. Herrizaingo Sailarekin harremanetan jartzeko asmoa azaldu zuen Askatasunak.

LABURREAN

Julio Iglesiasen bahiketaren inguruko epaiketan, gerra «galduta» duela esan dio Atxurra presoak auzitegiari



CHEMA MOYA / EFE
Julio Iglesias Zamora, atzo, Madril.

Julen Atxurra euskal presoak epaitu zuten atzo Espainiako Auzitegi Nazionalan, 1993an ustez Julio Iglesias Zamora enpresaburua bahitzeagatik. Atxurrak auzitegiko kideei haxe adierazi zien: «Zuen buruzagiei esan behar diezue gerra hau galduta dutela eta euren tramankuluak hartu eta alde egin behar dutela». Bere burua ETako kideatzat hartu zuen eta talde armatuan egon den bitartean egindako ekintzak bere gain hartu zituen. Zera esan zuen gero: «Ermuko

Foroa eta Aski Dal-k Leila uhartera joan beharko lukete, ea han zerbait lortzen duten». Fiskalak eta akusazio partikularrak 15 urteko espetxe zigorra eskatu dute, eta defentsak absoluzioa.

Tortura eta neurri arbitrarioak eragozteko arauak onartu ditu Europako Kontseiluak

Europako Kontseilua osatzen duten 44 herrialdeek tortura eta neurri «arbitrarioak» debekatzeko arauak onartu dituzte. Onartutakoaren berri Kontseiluko idazkari nagusi Walter Schwimmerrek jakinarazi zuen. Herrialdeek indarkeriaren aurka hartutako erabakiek «legearen barruan» egon behar dutela dio testuak. Atxilotetak, babes polizia, prozedura judizialak, estradizioak eta biktimen kalte-ordainak ere aipatzen ditu. Gainera, testuak dio ezin zaiola ezarri «inola ere» terrorismoaz akusatutako pertsonari heriotza zigorra.

Fernando Buesaren aldeko I. Mintegiak haren pentsaera «bizirik iraunarazi» nahi du

I. Fernando Buesa Mintegia egiten ari dira egunotan Donostiako Miramar Jauregian, EHUKo udako ikastaroen barruan. Atzo mintegiko zuzendari Javier Otaolak adierazi zuenez, ekimen horren bitartez Buesaren «oroimena eta pentsaera bizirik iraunarazi» nahi dute. Era berean, «bera hil zutenen jomugun kontrako jarrera» piztu nahi dute. Lehen saioa atzo egin zen eta gaur izango da azkena. «Demokrazia, askatasuna eta aurrerapen sozialak egia bihurtzeko egungo gizartearen erronkei buruzko gogoeta» bultzatuko da bertan.

Erreenterian sinadurak bildu dituzte Batasuna legez kanpo uztearen kontra

Alderdien Legearen aurka eta Batasuna legez kanpo uztearen aurka atxikimendu bilketa egin dute Erreenterian (Gipuzkoa). Hainbat esparrutako ordezkariak ekainaren 15ean Bilbon egin zen manifestaziorako prestatu zuten manifestuaren inguruan egin dute sinadura bilketa, eta, kopurua baino gehiago, jende ezberdina eta herrian ezaguna dena bilatu dute. Euskalgintza, kultura, kirola, hostalaritza, politika edo hezkuntza arloetan ezagunak diren 44 lagunek sinatu dute. Sinatzaileen artean Rafa Bandres, Irune Minguez, Julen Beldarrain, Jon Maya, Isabel Lopez Aulestia, Inaxito Albisu, Cecilio Gastesi, Gerardo Karre, Luis Mari Oiarbide, Mikel Carcedo, Jon Ander Arrieta, Xabier Oleaga eta Juan Ignacio Gurrutxaga daude, besteak beste.

AUZITEGI NAZIONALA

Hiruna urteko zigorra jarri diete batzoki bati su emateagatik epaitutako gazteei

Erredakzioa | DONOSTIA

Espainiako Auzitegi Nazionalak hiruna urteko espetxe zigorra ezarri die 1997an Herri Batasunako Mahai Nazionalaren espetxeratzea salatzeko Sukarrieta-ko batzokiari eraso egiteaz akusatutako hiru gazteei. Hasiera bateko 15 urteko zigor eskaera jaitsti zuen fiskalak eta defentsarekin ados jarri zen.

Ertzaintzak duela bi aste Zigor Iturrieta atxilotu zuen eta Iker Goikoetxea eta Urko Manizidor atxilotzen saiatu zen, «ihes egiteko arriskua» zegoelakoan. Lehenago, 1998ko urtarilean ere atxilotu zituen Ertzaintzak. Hiru gazteak Madril- en espetxeratu zituzten atzo.

ATXILOKETAK

Aske dira Donostiako Itsas Komandantziari pintura jaurtitzeaz akusatutako zazpi gazteak

Erredakzioa | DONOSTIA

Igande arratsaldean Ertzaintzak Donostiako Alde Zaharrean atxiloturiko zazpi gazteetatik azkena aske geratu zen atzo, epailearen aurretik pasatu ostean. Beste sei gazteak, adingabeak izanik, igande gauean bertan utzi zituzten aske. Gazte haietarik bi aurreko ostiralean ere atxilotu zituzten, Telepizzako lokal bati eraso egitea leporatuta.

Gertaerak igandeko 19:30ean izan ziren; talde batek Donostiako Itsas Komandantziako eraikinari margoa bota zion. Handik ordubetera, Ertzaintzak Trinitate plazan zeuden zazpi gazte atxilotu zituen. Hain zuzen ere, gaur, Karmengo eguna, Espainiako Itsas Komandantziaren eguna ospatzen da.

NAFARROA OINEZ 2002 TUTERA URRIAREN 20AN

KANTUA 3,50€

MUGA GUZTIEN GAINETIK, EUSKARA

LAGUNTZAILEA:

www.nafarroaoinez.net

Egunkaria

ARGIA
IKASTOLA

KUPOIA MOZTU, ERAMAN ZURE
KIOSKORA ETA NAFARROA OINEZEN CDA
LORTUKO DUZU 3,50 EUROREN TRUK

NAFARROA OINEZ 2002 TUTERA URRIAREN 20AN

KANTUA 3,50€